


Cumegn Albula/Alvra



Lescha davart las tariffas generalas digl cumegn Albula/Alvra (Lescha da tariffas;LT)

**Approvada dalla radunanza communal igls 21 d'avregl 2017
e messa an vigour dalla suprastanza communal per igl 1. da fanadour 2017**

**Lescha davart las tariffas generalas
digl cumegn Albula/Alvra (Lescha da tariffas; LT)**

Sa basond agl art. 35 cf. 2 dalla constituziun digl cumegn Albula/Alvra ò la radunanza communal decidia suandontamaintg:

I. Determinaziuns generalas

Art. 1 Scopo

Chella lescha regla igl incasso da tariffas e l'indemnisaziun d'expensas per disposiziuns e decisiuns scu er per igl far adiever d'indrezs publics e tgossas da cumegn.

Art. 2 Validitad

¹ Dalla lescha vign fatg adiever conform agl senn per disposiziuns e decisiuns da cumegn tgi sa basan agl dretg federal e cantunal.

² Determinaziuns spezialas conformas alla lescha davart igl incasso da tariffas restan resalvadas. Igl prancepis general da chesta lescha, an spezial pertutgont la cumpetenzza, referimaint e protecziun giuridica, restan pero applitgabels conforma agl senn.

Art. 3 Definiziuns dallas noziuns

Ainten chesta lescha montan:

- a. tariffas administrativas: indemnisaziun per activitads statalas.
- b. tariffas d'adiever: indemnisaziun per igl far adiever d'indrezs e tgossas publicas, schi chel surpassa en adiever general.
- c. Expensas: Las ulteriouras expensas effectivas caschunadas agl cumegn cun adampleir prestaziuns da sarvetsch sottomessas allas tariffas. Tranter chellas crodan an spezial costs per terzas persungas scu expertisas, procurar documents, costs da transmissiun e communicaziun scu er costs da viadis e transports.

II. Prancepis digl incasso da taxas

Art. 4 Debitours da taxas

¹ Chel tgi caschung a ena disposiziun u ena decisiun u dovra indrezs e tgossas publicas, ò da paer las taxas ed igls costs correspondents.

² Schi ples participants ageschan da cuminanza, onigl da star bung solidaricamaintg per las taxas ed expensas.

Art. 5 Proceduras contestablas e sacuntignelir perfid

¹ Per cass da proceduras contestablas, ò la parteida tgi ò pers sa surpiglier tottas taxas ed expensas. Tiers chegl pò ella neir oblieida da ramplazzar alla parteida tgi ò gudagnea igls costs caschunos antras chella dispeta da dretg. Schi nigna parteida ò gudagnea cumplagnamaintg, on las taxas ed expensas da neir re-parteidadas proporziunalmaintg.

² Costs, tgi ena parteida caschungia antras en sacuntigneir perfid u antras violaziun dallas prescripziuns da procedura essenzialas, von a sies chint.

³ Pertutgont indemnizaziun da parteida valan las determinaziuns dall'ordinaziun digls costs da procedura conform agl senn. Resalvo resta art. 96 alinea 2 LPTGR/KRG.

Art. 6 Paiamaint anticipo digls costs

¹ Igl cumegn pò pretender en paiamaint anticipo commensuro, schinavant tgi vign betg agea uffizialmaintg.

² En paiamaint anticipo è da pretender an spezial, schi ena dumonda è evidentalmaintg invana, schi exista nigna garanzeia per igl paiamaint dallas taxas e digls costs scu er tar chints retardos u tar domicil aint igl exterior.

³ En paiamaint anticipo ò da neir paea ainfer igl termin fixo. Schi chel vign betg paea, malgro en ranviament allas consequenzas digl retard, vign betg antro sen la dumonda u fatschenta.

III. Calculaziun dallas tariffas

Art. 7 Fixaziun

¹ La tariffa monta per regla en import tranter 10.00 fr. e maximal 20'000.00 fr. e vala cun excepziun dallas expensas scu indemnizaziun per tot las prestaziuns da sarvetsch ed igl far adiever tenor art. 3 lit. a e b.

² La taxa sa drezza ainfer igl rom dallas tariffas fixadas tenor igl volumen e la difficultad dalla tgossa scu er dalla valeta e dall'impurtanza dall'activitad statala per la persunga oblieida da paer la taxa.

³ Per prestaziuns, per las qualas i exista nign'obligaziun legala per igl cumegn, pò l'indemnizaziun sen basa d'ena cunvignientscha precedentia an scretg, neir taxada conform allas tariffas da honorar dallas assoziaziuns professiunalas u da persungas privatas digl rom.

Art. 8 Surpassamaint dallas tariffas da taxas

Tar proceduras voluminousas e difficilas, pò la tariffa neir dulzada per igl dobel tenor art. 7 alinea 1.

Art. 9 Reducziun e relascheda

Cumplettamaintg u parzialmaintg pò neir renunztgia, uffizialmaintg u sen dumonda, agl incasso da tariffas e d'expensas, schi:

- a. la procedura vign betg exequida a fegn;
- b. sa tracta d'ena prestaziun da sarvetsch minimala, numnadamaintg per simplas infurmaziuns;
- c. exista en interess predominant public ve dalla disposiziun u decisiun;
- d. exista en cass gravant mutivo per la persunga oblieida da paer la taxa.

Art. 10 Taglias e contribuziuns

Taglias e contribuziuns incassadas da represchentsants dalla suveranità sen las prestaziuns da sarvetsch prestadas digl cumegn, an spezial la taglia sen la plevaleta, vignan messas a chint cumplettamaintg.

IV. Cumpetenzas, referimaints e meds legals

Art. 11 Decisiuns

La decisiun davart tariffas ed expensas vign tratga digl post responsabel principal. Ella ò da neir muneida cun en'indicaziun digls meds legals.

Art. 12 Scadenza e tschains da retard

¹ Tariffas ed expensas on da neir paedas cun igl decret dalla disposiziun u dalla decisiun resp. cun far adiever digls indrezs e dallas tgossas publicas.

² Schi vign do chint, stò chel neir paea an terma da 30 deis.

³ Siva dalla scadenza digl termin da paiamaint survign la persunga tgi è oblieida da paer igls costs en'admuniziun an scretg davart igl retard. Igl tschains da retard vign chinto mintgamai tenor la taxa cantunala vertenta.

Art. 13 Scadenza

¹ Pretensiuns da tariffas e d'expensas scrodan diesch onns siva dall'antrada da scadenza.

² La scadenza scumainza betg u stat salda:

- a. schi vign pretandia ena decisiun contestabla;
- b. durant ena procedura da recurs;
- c. schi dei tgi ena pretensiun da tariffas stat sot moratori.

³ La scadenza vign interrotta e scumainza da nov cun:

- a. mintga act administrativ drizzo sen constataziun dalla pretensiun da tariffas, tgi vign emess per cunaschientscha alla persunga oblieida da paer taxas;
- b. mintga rancunaschientscha dalla pretensiun da tariffas antras la persunga oblieida da paer taxas;
- c. mintga paiamaint parzial;
- d. l'inoltraziun d'ena dumonda da relasch.

Art. 14 Decisiun da costs

¹ La decisiun davart igls costs succeda per regla aint igl dispositiv dalla disposiziun u decisiun correspondent. Igl post responsabel pò incassar igls costs er an furma d'ena disposiziun independenta.

² L'emissiun d'en simpel chint è lubeida.

Art. 15 Dretgs legals

¹ La procedura da meds legals per igls costs sa drezzan da prancepi alla nunvaledad dalla decisiun principala.

² Cunter decisiuns dalla suprastanza communal pò neir recurria tar la dertgira administrativa an terma da 30 deis siva dalla cunsigna. La procedura sa drezza tenor la lescha cantunala davart la giurisdicziun administrativa (LGA/VRG; BR 370.100).

³ Recurs pertutgont igls chints da tariffas d'en post uffizial subordino on da neir inol-tros alla suprastanza communal an terma da 30 deis an scretg e mutivo. Chella examinescha igl recurs e relascha ena decisiun an scretg e mutivada.

v. Determinaziuns finalas

Art. 16 Reglamaint

La suprastanza communal relascha en reglamaint da tariffas, an spezial davart la tariffa da taxas.

Art. 17 Vigour

¹ Chesta lescha è sottamesa agl referendum facultativ.

² La suprastanza communal definescha l'antrada an vigour da chesta lescha.


³ Cun l'antrada an vigour è dissolveidas tottas determinaziuns dad oters decrets tgi stattan an cuntradicziun cun chesta lescha.

Igl mastral



Daniel Albertin

Igl scrivant da cumegn



Maurus Engler